



BOSNA I HERCEGOVINA
VIJEĆE MINISTARA
Generalno tajništvo

Broj: 05-02-3532-2/12
Sarajevo, 27.12.2012. godine

28.12.2012	
01/02-02-1-54/12	B

PARLAMENTARNA SKUPŠTINA BiH

- *Zastupnički dom* -
- *Dom naroda* -

SARAJEVO

PREDMET: Prijedlog zakona o upravljanju imovinom privremeno i trajno oduzetom u kaznenom postupku predom Sudom Bosne i Hercegovine

Vijeće ministara Bosne i Hercegovine, na 31. sjednici održanoj 11.12.2012. godine, utvrdilo je Prijedlog zakona o upravljanju imovinom privremeno i trajno oduzetom u kaznenom postupku predom Sudom Bosne i Hercegovine, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po temeljnom zakonodavnom postupku.

U svezi s navedenim, u privitku dostavljamo Prijedlog zakona o upravljanju imovinom privremeno i trajno oduzetom u kaznenom postupku predom Sudom Bosne i Hercegovine, na bosanskom, hrvatskom i srpskom jeziku, kao i elektroničku verziju Prijedloga zakona.

S poštovanjem,

GENERALNI TAJNIK

Zvonimir Kutleša

BOSNA I HERCEGOVINA

VIJEĆE MINISTARA

PRIJEDLOG

**ZAKON
O UPRAVLJANJU IMOVINOM PRIVREMENO I TRAJNO ODUZETOM U
KRIVIČNOM POSTUPKU PRED SUDOM BOSNE I HERCEGOVINE**

Sarajevo, decembar 2012. godine

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine na sjednici Zastupničkog doma, održanoj dana _____ 2012. godine, i na sjednici Doma naroda, održanoj dana _____ 2012. godine, usvojila je

ZAKON
O UPRAVLJANJU IMOVINOM PRIVREMENO I TRAJNO ODUZETOM U
KRIVIČNOM POSTUPKU PRED SUDOM BOSNE I HERCEGOVINE

DIO PRVI - OPĆE ODREDBE

Član 1.
(Predmet zakona)

Ovim zakonom uređuje se način upravljanja privremeno ili trajno oduzetim predmetima, imovinom i imovinskom koristi ostvarenom krivičnim djelom, za koje Sud Bosne i Hercegovine (u daljnjem tekstu: Sud) prema pravilima krivičnog postupka, prije, tokom i nakon okončanja krivičnog postupka donese odluku o privremenom ili trajnom oduzimanju.

Član 2.
(Značenje izraza)

(1) Imovinom, u smislu ovog zakona, smatraju se: novac, pokretne stvari, nepokretnosti, dragocjeni predmeti (zlato, plemeniti metali, drago ili poludrago kamenje, biseri i drugi vrijedni predmeti), druga stvarna prava na stvarima, vrijednosni papiri u skladu sa zakonom, druge isprave kojima se dokazuje pravo svojine na imovini, prihod ili druga korist ostvarena neposredno ili posredno iz krivičnog djela te dobro u koje je ona pretvorena ili s kojim je pomiješana.

(2) Upravljanje imovinom obuhvata skladištenje, čuvanje, davanje u zakup, povrat i prodaju oduzete imovine, procjenu vrijednosti oduzete imovine, deponovanje novčanih sredstava dobijenih od prodaje oduzete imovine, vođenje evidencije o oduzetoj imovini i druge poslove u skladu sa zakonom.

(3) Privremeno oduzetim predmetima, u smislu ovog zakona, smatraju se:

- a) predmeti koji se, prema Krivičnom zakonu Bosne i Hercegovine, imaju oduzeti ili koji mogu poslužiti kao dokaz u krivičnom postupku;
- b) predmeti koji se, prema Krivičnom zakonu Bosne i Hercegovine, moraju oduzeti i kad se krivični postupak ne završi presudom kojom se optuženi proglašava krivim, ako to zahtijevaju interesi opće sigurnosti i interesi morala;
- c) sumnjivi predmeti nađeni kod osumnjičenog, odnosno optuženog, a za koje se ne zna čiji su.

DIO DRUGI - AGENCIJA

Član 3.
(Agencija za upravljanje imovinom)

(1) Poslove upravljanja imovinom obavlja Agencija za upravljanje imovinom privremeno i trajno oduzetom u krivičnom postupku (u daljnjem tekstu: Agencija) prema odluci Suda o privremenom oduzimanju imovine i pravosnažnoj odluci o trajnom oduzimanju imovine.

(2) Agencija je samostalna upravna organizacija Bosne i Hercegovine koja se osniva u skladu sa Zakonom o upravi Bosne i Hercegovine ("Službeni glasnik BiH", br. 32/02, 102/09).

(3) Agencija ima status pravnog subjekta.

Član 4. (Sjedište i pečat)

(1) Sjedište Agencije je u Sarajevu.

(2) Agencija ima pečat u skladu sa Zakonom o pečatima institucija Bosne i Hercegovine ("Službeni glasnik BiH", br. 12/98, 14/03 i 62/11).

Član 5. (Rukovođenje)

(1) Radom Agencije rukovodi direktor.

(2) Za direktora može biti imenovana osoba koja, osim općih uvjeta za rad u institucijama Bosne i Hercegovine, ima završen pravni ili ekonomski fakultet prije reforme visokog obrazovanja ili osoba koja je po sistemu obrazovanja prema Bolonjskom procesu završila četverogodišnji studij, pod uvjetom da je stekla najmanje 240 ECTS bodova i deset godina radnog iskustva, od čega najmanje pet godina na poslovima rukovođenja.

(3) Direktora imenuje Vijeće ministara Bosne i Hercegovine (u daljnjem tekstu: Vijeće ministara), u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik BiH", br. 07/03 i 37/03).

(4) Direktor se imenuje na mandat od četiri (4) godine i može imati najviše dva (2) uzastopna mandata.

Član 6. (Ovlaštenja direktora)

(1) Direktor zastupa i predstavlja Agenciju, organizuje i osigurava zakonito, pravilno i efikasno obavljanje poslova iz nadležnosti Agencije.

(2) Direktor Agencije odlučuje o pravima, obavezama i dužnostima zaposlenih u Agenciji, u skladu sa zakonom.

(3) Za svoj rad i rad Agencije direktor odgovara Vijeću ministara.

Član 7. (Unutrašnje uređenje Agencije)

(1) Na rad, unutrašnje uređenje i sistematizaciju radnih mjesta u Agenciji primjenjuju se propisi o državnoj upravi.

(2) Plaće i naknade zaposlenih u Agenciji određene su Zakonom o plaćama i naknadama u institucijama Bosne i Hercegovine ("Službeni glasnik BiH", br. 50/08, 35/09, 75/09, 32/12, 42/12 i 50/12).

(3) Zaposleni u Agenciji na stručnim poslovima imaju status državnih službenika, na koje se primjenjuje Zakon o državnoj službi u institucijama Bosne i Hercegovine ("Službeni glasnik BiH", br. 12/02, 19/02, 8/03, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10 i 40/12), a zaposleni na pomoćnim i tehničkim poslovima su zaposlenici, na koje se primjenjuje Zakon o radu u institucijama Bosne i Hercegovine ("Službeni glasnik BiH", br. 26/04, 7/05, 48/05 i 60/10).

(4) Način organizovanja, broj zaposlenih i unutrašnja organizacija i sistematizacija radnih mjesta u Agenciji utvrđuje se pravilnikom koji donosi direktor Agencije uz saglasnost Vijeća ministara u roku 60 dana od dana imenovanja direktora.

Član 8. **(Sredstva za rad)**

Sredstva za rad Agencije osiguravaju se u Budžetu institucija Bosne i Hercegovine i međunarodnih obaveza Bosne i Hercegovine.

Član 9. **(Nadležnost)**

(1) U okviru prava i dužnosti predviđenih zakonom, Agencija je nadležna da:

a) upravlja privremeno oduzetim predmetima i imovinom, oduzetom imovinom stečenom krivičnim djelom, imovinskom koristi pribavljenom krivičnim djelom i imovinom datom na ime jemstva u krivičnom postupku;

b) na prijedlog Suda vrši stručnu procjenu oduzete imovine proistekle iz krivičnog djela;

c) skladišti, čuva, daje u zakup i prodaje privremeno oduzetu imovinu stečenu krivičnim djelom te raspolaže tako dobijenim sredstvima u skladu sa zakonom;

d) vodi evidencije o oduzetoj imovini kojom, u smislu stava (1) tačke a) ovog člana, upravlja i sudskim postupcima u kojima je odlučivano o takvoj imovini;

e) učestvuje u izradi programa za obuku državnih službenika u vezi s oduzimanjem imovine stečene krivičnim djelom;

f) vrši obradu i praćenje statističkih podataka iz svoje nadležnosti;

g) obavlja i druge poslove povjerene zakonom.

(2) Način obavljanja poslova iz nadležnosti Agencije može biti detaljnije regulisan podzakonskim aktima.

Član 10. **(Nezavisnost)**

(1) Agencija je samostalan i nezavisan organ Bosne i Hercegovine i svoju funkciju obavlja nezavisno od drugih organa vlasti i institucija Bosne i Hercegovine.

(2) Nijedan državni organ ili institucija nema pravo da na bilo koji način utječe na rad Agencije.

(3) Agencija može od drugih državnih organa ili institucija zahtijevati dostavljanje određenih podataka ili obavijesti koje su joj potrebne za obavljanje poslova, a organi su dužni pravovremeno dostaviti odgovor i postupiti u skladu sa zahtjevom Agencije.

DIO TREĆI - PREUZIMANJE I PROCJENA VRIJEDNOSTI IMOVINE

Član 11. **(Preuzimanje predmeta i imovine na čuvanje)**

(1) Na osnovu odluke Suda o privremenom ili trajnom oduzimanju imovine, Agencija preuzima na čuvanje i upravljanje:

- a) predmete i imovinu koji su, prema Krivičnom zakonu Bosne i Hercegovine, privremeno oduzeti;
- b) predmete koji mogu poslužiti kao dokaz u krivičnom postupku;
- c) imovinu za koju je Sud donio privremenu mjeru oduzimanja, mjeru zapljene ili drugu neophodnu privremenu mjeru;
- d) predmete i imovinu koji su trajno oduzeti;
- e) oduzetu imovinsku korist pribavljenu krivičnim djelom;
- f) imovinu datu na ime jemstva u krivičnom postupku.

(2) Ako je u toku postupka Sud donio odluku o vraćanju predmeta ili imovine ili ukinuo privremenu mjeru oduzimanja imovine, mjeru zapljene ili drugu neophodnu privremenu mjeru, Agencija će postupiti prema odluci Suda i osobi kojoj Sud odredi vratiti imovinu ili predmete koji su joj povjereni na čuvanje i upravljanje.

(3) Ako Sud nije donio odluku iz stava (2) ovog člana, Agencija upravlja oduzetom imovinom i predmetima do pravosnažnosti odluke o trajnom oduzimanju predmeta ili imovine.

(4) Predmete i imovinu iz stava (1) ovog člana Agencija preuzima i vraća uz zapisnik u koji se unose podaci o vlasniku i imovini, stanju u kojem je imovina preuzeta, vrijednosti imovine, roku oduzimanja, privremenom ili trajnom oduzimanju, načinu čuvanja te drugi važni podaci za kojima se ukaže potreba.

(5) Sadržaj zapisnika o preuzimanju i vraćanju predmeta i imovine propisuje direktor Agencije.

Član 12.
(Evidencija)

- (1) Agencija vodi evidenciju o imovini koja joj je povjerena na čuvanje i upravljanje.
- (2) U evidenciju iz stava (1) ovog člana unose se sljedeći podaci:
 - a) broj odluke;
 - b) naziv suda;
 - c) osnov i rok oduzimanja;
 - d) podaci o imovini, procijenjena vrijednost imovine;
 - e) ime, prezime, jedinstveni matični broj građanina (JMBG) i adresa fizičkog subjekta, odnosno naziv, sjedište i identifikacioni broj pravnog subjekta od kojeg je imovina oduzeta.
- (3) Način vođenja evidencije iz stava (1) ovog člana propisuje ministar pravde Bosne i Hercegovine.

Član 13.
(Procjena vrijednosti oduzete imovine)

- (1) Procjenu vrijednosti i količinu oduzete imovine, za potrebe postupka, Sud može povjeriti Agenciji.
- (2) Agencija vrši procjenu oduzete imovine iz stava (1) ovog člana u trenutku oduzimanja imovine.

Član 14.
(Način procjene vrijednosti oduzete imovine)

- (1) Agencija vrši procjenu vrijednosti preuzete imovine prema njenoj tržišnoj vrijednosti u trenutku preuzimanja.
- (2) Procjenu vrijednosti imovine preuzete na čuvanje i upravljanje Agencija može povjeriti stručnoj osobi, organizaciji ili instituciji koja ispunjava uvjete za obavljanje te vrste poslova.

DIO ČETVRTI - UPRAVLJANJE

Član 15.
(Upravljanje i čuvanje privremeno oduzete imovine)

- (1) Agencija upravlja privremeno oduzetom imovinom na način koji garantuje potreban stepen očuvanja njene vrijednosti, uz najniže troškove.
- (2) Agencija je dužna voditi brigu o zaštiti interesa vlasnika imovine, savjesnih držalaca i subjekata kojima je imovina privremeno oduzeta, u skladu sa zakonom.
- (3) Agencija može radi očuvanja njene vrijednosti privremeno oduzetu imovinu prodati, u skladu s odredbama ovog zakona, a novčana sredstva dobijena prodajom čuvaju se do pravosnažnosti odluke na posebnom računu Agencije i koriste za povrat imovine, naknadu štete i naknadu troškova uništenja imovine.

(4) Novčana sredstva iz stava (3) ovog člana čuvaju se kao neoročeni depozit po najpovoljnijoj kamatnoj stopi.

Član 16.

(Prenošenje prava upravljanja oduzetom imovinom)

(1) Upravljanje oduzetom imovinom Agencija može povjeriti organizaciji ili instituciji koja je registrovana i ispunjava zakonom propisane uvjete za upravljanje tom vrstom imovine.

(2) Prava i obaveze u pogledu upravljanja imovinom iz stava (1) ovog člana uređuju se ugovorom zaključenim u skladu sa zakonom.

(3) Organizacija ili institucija iz stava (1) ovog člana dužna je da upravlja povjerenom imovinom u skladu sa zakonom i obavezama iz ugovora.

(3) Nadzor nad upravljanjem povjerenom imovinom vrši Agencija.

Član 17.

(Upravljanje dragocjenim i predmetima od posebne vrijednosti)

(1) Privremeno oduzete predmete od historijske, umjetničke i naučne vrijednosti Agencija može predati na čuvanje specijalizovanim ustanovama do pravosnažnosti odluke.

(2) Privremeno oduzete devize, efektivni strani novac te dragocjene predmete Agencija može predati na čuvanje Centralnoj banci Bosne i Hercegovine, do pravosnažnosti odluke.

Član 18.

(Upravljanje nekretninama)

(1) U slučaju privremenog oduzimanja nepokretne imovine, Agencija je dužna preduzeti mjere za njeno čuvanje i održavanje.

(2) O privremeno oduzetoj nepokretnoj imovini Agencija je dužna obavijestiti organ nadležan za vođenje poslova evidencije nepokretnosti radi bilježenja tereta u evidenciju o nepokretnostima.

(3) Na prijedlog Agencije, a po pribavljenom mišljenju tužioca, Sud može dati saglasnost da se privremeno oduzeta nepokretnost izda u zakup, a dobijenim novčanim sredstvima raspolaže se u skladu s ovim zakonom.

(4) Za štetu uzrokovanu zakupom odgovara Bosna i Hercegovina, prema općim pravilima o odgovornosti za štetu.

Član 19.

(Obavezno uništavanje oduzete imovine)

(1) Oduzeta imovina koja se mora uništiti zbog zaštite života i zdravlja ljudi i životinja, zaštite okoliša, sigurnosnih i drugih razloga, uništava se pod nadzorom nadležnih organa, u skladu sa zakonom.

- (2) Konačnu odluku o troškovima uništenja donosi Sud po okončanju postupka.
- (3) Troškove uništenja imovine do donošenja odluke iz stava (2) ovog člana snosi Agencija.

Član 20.
(Troškovi čuvanja)

- (1) Troškove čuvanja i održavanja privremeno oduzete imovine snosi Agencija.
- (2) Ako je Sud donio odluku da privremeno oduzeta imovina ostane kod vlasnika, Agencija je dužna vršiti nadzor nad upravljanjem povjerenom imovinom.

Član 21.
(Prodaja oduzete pokretne imovine radi održavanja oduzete nekretnine)

- (1) Ako je istom vlasniku privremeno oduzeta pokretna i nepokretna imovina, na prijedlog Agencije, a po pribavljenom mišljenju tužioca, Sud može dati saglasnost da Agencija proda privremeno oduzetu pokretnu imovinu i iz sredstava dobijenih prodajom namiri nužne troškove čuvanja i održavanja privremeno oduzete nepokretne imovine.
- (2) Ako rješenje o privremenom oduzimanju pokretne imovine bude ukinuto, do konačne sudske odluke troškove čuvanja i održavanja privremeno oduzete nepokretne imovine snosi Agencija.

DIO PETI - POSTUPAK PRODAJE ODUZETE POKRETNE IMOVINE

Član 22.
(Prodaja pokretne imovine)

- (1) Prodaja pokretne imovine vrši se usmenim javnim nadmetanjem koje se oglašava u „Službenom glasniku Bosne i Hercegovine“.
- (2) Lako kvarljiva roba i životinje mogu se prodati bez usmenog javnog nadmetanja.
- (3) Pokretna imovina prodaje se po istoj ili višoj cijeni od procijenjene vrijednosti koju je odredila Agencija.
- (4) Ako pokretna imovina ne bude prodana nakon dva usmena javna nadmetanja, prodaja se može izvršiti neposrednom pogodbom.
- (5) U skladu s ovim članom vrši se prodaja pronađenih sumnjivih stvari.

Član 23.
(Jemstvo)

- (1) Agencija može uz saglasnost Suda odobriti da se umjesto prodaje pokretne imovine prihvati jemstvo u visini najmanje 50% procijenjene vrijednosti, koje ponudi vlasnik imovine ili druga osoba.

(2) Nakon polaganja jemstva, imovina se predaje davaocu jemstva.

Član 24.
(Odluka o poklonu i uništenju pokretne imovine)

(1) Ako prodaja nije uspjela neposrednom pogodbom, oduzeta pokretna imovina može se pokloniti u humanitarne svrhe, odnosno uništiti.

(2) Odluku o poklonu imovine iz stava (1) ovog člana na prijedlog direktora donosi Vijeće ministara Bosne i Hercegovine.

(3) Odluku o uništenju imovine iz stava (1) ovog člana donosi direktor nakon pribavljenog mišljenja nadležne institucije, kojim se potvrđuje postojanje zdravstvenih, veterinarskih, fitosanitarnih, sigurnosnih ili drugih razloga propisanih zakonom.

(4) Imovina se uništava pod nadzorom Agencije u skladu s posebnim propisima i preporukama, prema mišljenju institucije iz stava (3) ovog člana.

Član 25.
(Postupanje s trajno oduzetom nepokretnom imovinom)

Nepokretna imovina koja je trajno oduzeta na osnovu pravosnažne sudske presude upisuje se u zemljišne knjige kao svojina Bosne i Hercegovine i s njom se postupa u skladu s propisima koji uređuju postupanje s nepokretnostima u svojini Bosne i Hercegovine.

Član 26.
(Postupanje s trajno oduzetim vrijednim predmetima)

(1) Na osnovu pravosnažne sudske presude, trajno oduzeti predmeti od historijske, umjetničke i naučne vrijednosti postaju državna svojina i predaju se specijalizovanim ustanovama, koje na prijedlog direktora odredi Vijeće ministara.

(2) Na osnovu pravosnažne sudske presude, trajno oduzeti dragocjeni predmeti, vrijednosni i drugi papiri postaju državna svojina i predaju se Ministarstvu finansija i trezora Bosne i Hercegovine.

Član 27.
(Primjena drugih propisa)

Na postupak prodaje oduzete imovine shodno se primjenjuju odredbe zakona kojim se uređuje izvršni postupak, ako ovim zakonom nije drukčije propisano.

Član 28.
(Oduzimanje imovine i imovinske koristi pribavljene krivičnim djelom)

(1) U skladu s odredbama ovog zakona, Agencija postupa po pravosnažnim odlukama Suda za trajno oduzimanje imovine i imovinske koristi pribavljene krivičnim djelom.

(2) Na način iz stava (1) ovog člana Agencija postupa po rješenju Suda kojim se određuje da je vrijednost data kao jemstvo prihod Budžeta Bosne i Hercegovine.

DIO ŠESTI - VRAĆANJE PRIVREMENO ODUZETE IMOVINE

Član 29.

(Vraćanje privremeno oduzete imovine)

- (1) O vraćanju privremeno oduzete imovine odluku donosi Sud.
- (2) U odluci iz stava (1) ovog člana Sud određuje osobu kojoj će se imovina predati i rok u kojem je osoba dužna preuzeti privremeno oduzetu imovinu.
- (2) Sud odluku dostavlja Agenciji koja je dužna da bez odgađanja vrati oduzetu imovinu.
- (3) O vraćanju imovine sačinjava se zapisnik koji potpisuje ovlaštena osoba Agencije i osoba kojoj se imovina vraća.
- (4) Ako osoba u roku iz stava (2) ovog člana ne preuzme imovinu i ako ne obavijesti Sud ili Agenciju o opravdanim razlozima nepreuzimanja, Agencija će zatražiti da Sud donese odluku o trajnom oduzimanju imovine.

Član 30.

(Novčana naknada za oduzetu imovinu)

- (1) Ukoliko je privremeno oduzeta imovina prodana, Agencija je dužna da osobi koju odredi Sud vrati novčana sredstva dobijena prodajom imovine, uvećana za prosječnu kamatu po viđenju za odgovarajući period.
- (2) Ukoliko je imovina poklonjena ili uništena, osoba ima pravo na obeštećenje u visini procijenjene vrijednosti oduzete imovine u trenutku njenog oduzimanja.
- (3) Osoba iz st. (1) i (2) ovog člana kojoj su vraćena novčana sredstva može u roku 30 dana od dana povrata sredstava podnijeti Agenciji zahtjev za naknadu štete prouzročene privremenim oduzimanjem imovine.
- (4) Ako zahtjev za naknadu štete ne bude usvojen ili Agencija ne donese odluku o zahtjevu u roku 60 dana od dana podnošenja zahtjeva, vlasnik može Sudu podnijeti tužbu za naknadu štete, a ako je zahtjev samo djelimično usvojen, vlasnik može podnijeti tužbu u odnosu na preostali dio zahtjeva.

Član 31.

(Način raspodjele sredstava od prodaje trajno oduzete imovine)

- (1) Kada odluka o trajnom oduzimanju imovine postane pravosnažna, imovina i novčana sredstva dobijena prodajom imovine postaju svojina Bosne i Hercegovine.
- (2) Novčana sredstva dobijena prodajom trajno oduzete imovine, nakon namirenja troškova upravljanja imovinom, uplaćuju se u Budžet Bosne i Hercegovine.

DIO SEDMI - MEĐUNARODNA SARADNJA I NADZOR

Član 32. (Međunarodna pravna pomoć)

(1) U skladu s propisima kojima je uređena međunarodna pravna pomoć Sud donosi odluku o načinu upravljanja privremeno ili trajno oduzetom imovinom na osnovu odluke suda strane države.

(2) Agencija je dužna da po odlukama Suda postupa u skladu s ovim zakonom.

Član 33. (Izvještavanje o radu Agencije)

(1) Izvještaj o radu Agencija je dužna najmanje jednom godišnje dostaviti Vijeću ministara.

(2) Agencija je dužna obavijestiti Sud o svakoj provedenoj radnji naloženoj sudskom odlukom.

DIO OSMI - PRIJELAZNE I ZAVRŠNE ODREDBE

Član 34. (Rok za preuzimanje imovine na čuvanje)

(1) Sud može imovinu koja je privremeno ili trajno oduzeta prije početka primjene ovog zakona predati Agenciji u roku 60 dana od dana početka primjene ovog zakona.

(2) Postupci u predmetima oduzimanja imovinske koristi ostvarene krivičnim djelom u kojima je do dana stupanja na snagu ovog zakona donesena prvostepena odluka, po odluci Suda mogu se nastaviti prema odredbama ovog zakona.

Član 35. (Provedbeni propisi)

Propisi potrebni za provođenje ovog zakona donijet će se u roku šest mjeseci od dana stupanja na snagu ovog zakona.

Član 36. (Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku Bosne i Hercegovine", a primjenjuje se od 01.03.2013. godine.

PREDSJEDAVAJUĆI
Zastupničkog doma
Parlamentarne skupštine BiH

PREDSJEDAVAJUĆI
Doma naroda
Parlamentarne skupštine BiH

OBRAZLOŽENJE

ZAKONA O UPRAVLJANJU IMOVINOM PRIVREMENO I TRAJNO ODUZETOM U KRIVIČNOM POSTUPKU PRED SUDOM BOSNE I HERCEGOVINE

I - USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u članu III 1.g) Ustava Bosne i Hercegovine, prema kojem je u nadležnosti institucija Bosne i Hercegovine provođenje međunarodnih i međuentitetskih krivičnopравnih propisa, uključujući i odnose s Interpolom, te u članu IV 4.a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva ili za vršenje funkcija Parlamentarne skupštine Bosne i Hercegovine prema Ustavu Bosne i Hercegovine.

II - RAZLOZI ZA DONOŠENJE ZAKONA

Podsjećamo na to da je Mapom puta za liberalizaciju viznog režima za građane Bosne i Hercegovine Ministarstvu pravde Bosne i Hercegovine u nadležnost data aktivnost kojom će predložiti zakonska rješenja o oduzimanju imovine kriminalaca, uključujući skladištenje i upravljanje privremeno oduzetom imovinom te raspolaganje njome.

Nadalje, Zastupnički dom Parlamentarne skupštine Bosne i Hercegovine na 55. sjednici, održanoj 10. juna 2009. godine, donio je Zaključak kojim je zadužio Vijeće ministara Bosne i Hercegovine da u vezi s tim pripremi prijedlog zakona.

Polazeći od potrebe za garancijama utvrđenim u EKLJP-u i drugim međunarodnim aktima, **Ustav Bosne i Hercegovine u članu II *Ljudska prava i osnovne slobode*, u stavu 3. Katalog prava, pod tačkom k) garantuje svim osobama na teritoriji Bosne i Hercegovine uživanje ljudskih prava i sloboda, što uključuje i pravo na imovinu.**

Također, na globalnom planu niz međunarodnih akata upućuje na potrebu da se definiše sistem mjera koje omogućavaju efikasniju borbu protiv kriminala, oduzimanje prihoda stečenih kriminalom, oduzimanje imovinske koristi proistekle iz krivičnog djela. Kao i u ostalim državama, i u Bosni i Hercegovini krivičnim zakonodavstvom propisan je osnov za oduzimanje imovinske koristi proistekle iz krivičnog djela, i to po principu da niko ne može zadržati takvu imovinsku korist, a da će se ista oduzeti sudskom odlukom. Također, krivičnim zakonodavstvom uređeno je privremeno oduzimanje predmeta, privremeno oduzimanje imovine radi osiguranja, vraćanje privremeno oduzetih predmeta, te druga važna pitanja iz ove oblasti, a sve u svrhu efikasnog sudskog postupka.

Institut proširenog oduzimanja imovinske koristi pribavljene krivičnim djelom u bosanskohercegovačko zakonodavstvo je prvi put uveden reformom krivičnog zakonodavstva 2003. godine, a nešto detaljnije određen nedavnim izmjenama i dopunama Krivičnog zakona Bosne i Hercegovine. S propisima države Bosne i Hercegovine koji uređuju navedenu oblast usklađeni su zakoni u Federaciji Bosne i Hercegovine i Distriktu Brčko BiH, dok je u Republici Srpskoj 2010. godine donesen potpuno novi Zakon o oduzimanju imovine stečene izvršenjem krivičnog djela, kojim se uređuje i upravljanje privremeno i trajno oduzetom imovinom (sličan zakon je u proceduri usvajanja u Federaciji Bosne i Hercegovine).

Donošenje i provedba odgovarajućeg zakonodavstva koje se odnosi na oduzimanje imovinske koristi stečene krivičnim djelima uvjet je koji i Evropska unija duže vremena stavlja pred Bosnu i Hercegovinu, a Bosna i Hercegovina je u svojoj Strategiji za borbu protiv korupcije 2009.-2014. godine kao jedan od srednjoročnih strateških ciljeva postavila unapređenje postupaka i primjenjivost odredbi zakona o oduzimanju nezakonito stečene imovine i prava, koji bi prema tom dokumentu trebalo da bude ispunjen do kraja 2012. godine.

U Izvještaju o napretku Bosne i Hercegovine u 2011. godini, u dijelu koji se odnosi na borbu protiv organizovanoga kriminala i terorizma, Evropska komisija konstatovala je da „**pravni okvir za zapljenu imovine nije potpuno proveden**, a oduzimanje imovine stečene kriminalnim radnjama je i dalje neujednačeno na cijeloj teritoriji države. **Nedostaju efikasne strukture za upravljanje oduzetom imovinom i njeno održavanje**”.

Tačna je konstatacija Evropske komisije, jer Sud Bosne i Hercegovine ne samo da se bavi “sudovanjem”, nego i upravljanjem oduzetom imovinom i njenim održavanjem, a ovaj način se u najvećem dijelu pokazao neefikasnim.

Naime, privremenim oduzimanjem predmeta i imovine, kao radnjom procesne prinude, Sud pribavlja dokaze i predmete koji služe pri utvrđivanju činjenica u krivičnom postupku, odnosno sprečava vršenje krivičnih djela te onemogućava korištenje ili otuđenje određene imovine. Kako ova radnja dokazivanja predstavlja ograničenje pojedinih osnovnih prava čovjeka, predviđenih ustavnim ili međunarodnim pravom o pravima čovjeka, zbog toga je Sud preuzima samo pod zakonskim uvjetima i u zakonom propisanom postupku, što pruža garancije da će se prava građana ograničiti samo toliko koliko je to neophodno radi uspješnog vođenja krivičnog postupka. Dakle, krivično zakonodavstvo postavilo je opća pravila za njihovu primjenu, odnosno pravni osnov privremenog oduzimanja utvrđen je zakonskom normom - privremeno oduzimanje predmeta i imovine, po pravilu, naređuje Sud na prijedlog tužioca, zaštitu prava osoba čiji su predmeti, odnosno imovina privremeno oduzeti, kroz pravo ulaganja žalbe, izdavanje potvrde o privremenom oduzimanju, procesnopravne posljedice...

Također je potrebno naglasiti da Sud oduzima imovinsku korist u krivičnom postupku i da je osnov za takvu mjeru isključivo odluka Suda. Imovinska korist pribavljena krivičnim djelom utvrđuje se u krivičnom postupku po službenoj dužnosti. Uvođenjem tzv. odredbe “**Prošireno oduzimanje imovinske koristi pribavljene krivičnim djelom**” upotpunjeno je krivično zakonodavstvo i precizirana sva pitanja i postupanje Suda i Tužilaštva, odnosno organa gonjenja u vezi s privremenim i trajnim oduzimanjem predmeta, imovine i imovinske koristi pribavljene izvršenjem krivičnih djela, ali su **neriješena pitanja u vezi s upravljanjem privremeno i trajno oduzetom imovinom i njenim održavanjem**.

S obzirom na to da na globalnom planu niz međunarodnih akata upućuje na potrebu da se definiše sistem mjera koje omogućavaju, s jedne strane zaštitu ljudskih prava, a s druge strane efikasniji sudski postupak, oduzimanje prihoda proisteklih iz krivičnog djela, države okruženja uvele su *princip upravljanja dobrog domaćina* (Srbija, Hrvatska, Slovenija, Crna Gora).

Dakle, u navedenim državama u suštini krivično zakonodavstvo rješava sva pitanja u krivičnom postupku i osnov za svaku mjeru isključivo je odluka suda, a upravljanje privremeno i trajno oduzetim predmetima i imovinom povjereno je posebnom vansudskom organu. S obzirom na iskustva drugih država i na to da KZ-om BiH i ZKP-om BiH jedino nije uređeno upravljanje privremeno i trajno oduzetim predmetima i imovinom, pripremljena su ponuđena zakonska rješenja.

III - USKLAĐENOST PROPISA S EVROPSKIM ZAKONODAVSTVOM

O privremenom oduzimanju predmeta i imovine govori se u međunarodnim dokumentima, i to ne samo s aspekta zaštite osnovnih prava i sloboda (npr. čl. 8. EKLJP-a ili čl. 1. Protokola br. 1. EKLJP-a), već i iz razloga uspješnog suzbijanja kriminaliteta. U međunarodnim dokumentima su tako postavljeni standardi za nacionalna zakonodavstva, kako bi se efikasnije borili protiv organizovanoga kriminala. To podrazumijeva ugradnju u domaće pravo jačih mjera koje će dozvoliti državama da pod zakonskim uvjetima konfiskuju imovinu stečenu krivičnim djelom i primijene oštrije mjere protiv transnacionalnoga organizovanoga kriminala.

Zbog navedenog, krivično zakonodavstvo Bosne i Hercegovine usklađeno je s obavezama iz ove oblasti koje proizlaze iz **konvencija Vijeća Evrope** (npr. *Konvencija Vijeća Evrope o pranju, traganju, privremenom oduzimanju i oduzimanju prihoda stečenih krivičnim djelom i finansiranjem terorizma*, *Konvencija o pranju, traganju, privremenom oduzimanju i oduzimanju prihoda stečenih krivičnim djelom*, *Krivičnopravna konvencija protiv korupcije*, *Evropska konvencija o sprečavanju terorizma*, *Konvencija o kibernetičkom kriminalu*, *Konvencija Vijeća Evrope o borbi protiv trgovine ljudima...*) i **konvencija UN-a** (npr. *Konvencija protiv nezakonitog prometa opojnih droga i psihotropnih supstanci*, *Konvencija Ujedinjenih naroda protiv transnacionalnoga organizovanoga kriminala*, *Protokol o sprečavanju, zaustavljanju i kažnjavanju trgovine ljudima, naročito ženama i djecom, kojim se dopunjuje Konvencija UN-a protiv transnacionalnoga organizovanoga kriminala...*).

Dakle, ono što zahtijevaju međunarodni akti regulisano je krivičnim zakonodavstvom, odnosno već je ugrađeno u KZBiH i ZKPBiH, te se ovim zakonom valjanost i primjena odredbi krivičnog zakonodavstva ne umanjuje. Nadalje, evropski standardi zahtijevaju normativno uređivanje upravljanja privremeno i trajno oduzetom imovinom, ali ne propisuju pravila, odnosno ona treba da se regulišu prvenstveno domaćim zakonom. Zbog navedenog, prijedlog zakona propisuje poštovanje dostojanstva osoba, uz uvažavanje svih prava koja uživa osoba protiv koje se vodi krivični postupak i kojoj je Sud svojom odlukom na osnovu krivičnih propisa ograničio pravo na imovinu.

S obzirom na to da je data mogućnost da svaka država individualno uređuje ovu oblast na način koji odgovara njenom ustavnom sistemu, državnoj strukturi i sl., ovom prilikom su se cijenili kako međunarodni akti, analizirani zakoni i praksa, kao i posljedice i rezultati svih zemalja koje imaju ove zakone, što za rezultat ima ponuđena rješenja.

IV - PROVEDBENI MEHANIZMI

Provođenje ovog propisa bilo bi osigurano putem uspostavljanja nezavisne agencije, koja bi bila u obavezi da u skladu sa zakonom postupa po zahtjevima i odlukama pravosudnih organa na nivou Bosne i Hercegovine.

V - KONSULTACIJE

S ciljem iznalaženja najpovoljnijih rješenja Ministarstvo pravde je izvršilo analizu propisa nekih država te je utvrđeno da:

U **Sloveniji** ne postoji poseban propis koji se odnosi na oduzimanje imovine proistekle iz krivičnog djela, već tu oblast definiše krivično zakonodavstvo (Krivični zakonik i Zakon o krivičnom postupku) i porezno zakonodavstvo. Osnovni princip za utvrđivanje i oduzimanje takve imovine je taj da niko ne može zadržati imovinsku korist koja je stečena krivičnim djelom ili zbog njega. U Sloveniji je detaljno propisan postupak upravljanja oduzetom imovinom u Uredbi o postupanju s oduzetim predmetima, imovinom i vrijednosnim papirima, i to predmetima koji su oduzeti u krivičnom postupku ili u vezi s njim, predmetima ili imovinom koja služi za privremeno osiguranje zahtjeva za oduzimanje imovinske koristi i predmetima ili imovinom koji su položeni kao kaucija.

U **Hrvatskoj** po Zakonu o postupku oduzimanja imovinske koristi ostvarene kaznenim djelom i prekršajem, imovinom koja je oduzeta na osnovu ovog zakona upravlja i raspolaže ured u skladu s posebnim propisom.

U **Srbiji** Zakon o oduzimanju imovine proistekle iz krivičnog djela propisuje da je organ nadležan za upravljanje imovinom proisteklom iz krivičnog djela Direkcija za upravljanje oduzetom imovinom, koja je pozicionirana u sastavu Ministarstva pravde.

U **Crnoj Gori** Zakonom o staranju o privremeno i trajno oduzetoj imovini ovi poslovi povjereni su organu uprave nadležnom za poslove upravljanja državnom imovinom. Navedeni propisi i praksa te posljedice i rezultati ovih, ali i drugih zemalja koje imaju ove zakone, poslužili su za pripremu ponuđenih rješenja.

Na pripremljeni nacrt zakona mišljenje u pisanoj formi dao je Sud Bosne i Hercegovine, čije su primjedbe prihvaćene i ugrađene, a u pripremi nacrta zakona učestvovali su predstavnici Tužilaštva Bosne i Hercegovine i Visokog sudskog i tužilačkog vijeća Bosne i Hercegovine.

Na pripremljeni nacrt zakona zatraženo je mišljenje od: Ureda za zakonodavstvo, Direkcije za evropske integracije, Ministarstva finansija i trezora Bosne i Hercegovine i Ministarstva za ljudska prava i izbjeglice. Direkcija za evropske integracije i Ministarstvo za ljudska prava i izbjeglice nisu imali primjedbi, dok su primjedbe Ureda za zakonodavstvo prihvaćene i ugrađene u tekst.

Ministarstvo finansija i trezora Bosne i Hercegovine, u pogledu osiguranja finansijskih sredstava, ovu aktivnost „smatra preuranjenom i s ekonomskog aspekta neracionalnom” (citat). Također je ukazano na nužnost ponovnog preispitivanja odredbi zakona, kako bi se stvorile osnove da se „kroz nadležnosti i raspoloživa sredstva izvršavaju zadaci u vezi s predmetom ovog zakona“.

Cijeneći mišljenje i sugestiju navedenog ministarstva, želi se istaći opravdanost provođenja aktivnosti na predloženi način.

U vezi s istaknutom „preuranjenošću“ podsjećamo na to da je Mapom puta za liberalizaciju viznog režima za građane Bosne i Hercegovine Ministarstvu pravde Bosne i Hercegovine u nadležnost data aktivnost kojom će predložiti zakonska rješenja o oduzimanju imovine kriminalaca, uključujući skladištenje i upravljanje privremeno oduzetom imovinom te

raspolaganje istom. Nadalje, Zastupnički dom Parlamentarne skupštine Bosne i Hercegovine na 55. sjednici, održanoj 10. juna 2009. godine, donio je Zaključak kojim je zadužio Vijeće ministara Bosne i Hercegovine da u vezi s tim pripremi prijedlog zakona. U Izvještaju o napretku Bosne i Hercegovine u 2011. godini, u dijelu koji se odnosi na borbu protiv organizovanoga kriminala i terorizma, Evropska komisija konstatovala je da *“...nedostaju efikasne strukture za upravljanje oduzetom imovinom i njeno održavanje”*, a gotovo identična ocjena data je i o pitanju pranja novca.

U vezi s istaknutim *“neracionalnim ekonomskim aspektom”* želimo istaći da samo u jednom predmetu koji je procesuiran na Sudu BiH još 2010. godine osoba je osuđena zbog organizovanoga kriminala i porezne utaje, a u državni budžet je trebalo da se vrati 2,7 miliona KM, dok je u drugom predmetu osoba osuđena na 12 godina zatvora zbog organizovanja prostitucije i trgovine ženama i po presudi je trebalo da bude oduzeta imovina u vrijednosti 286.440 KM. U ovim, a i u mnogim drugim predmetima Pravobranilaštvo BiH je pokrenulo postupak oduzimanja, ali u Budžet BiH nije još ništa uplaćeno. Zbog nemogućnosti adekvatnog upravljanja i čuvanja, imovina najčešće nije privremeno „blokirana“, pa Pravobranilaštvo BiH mora često otkrivati šta osuđeni posjeduje, što ponekad traje godinama, a kada se napokon dođe do te informacije, imovina je već rasprodana i nakon pravomoćnosti presude osuđenici ostaju bogati ljudi.

Nadalje, Radna grupa za izradu i praćenje provedbe Akcionog plana za sprečavanje i suzbijanje krivičnih djela u vezi s motornim vozilima 2012.-2015. godine identifikovala je *„da se veliki broj oduzetih vozila godinama nalazi u depozitu agencija za provođenje zakona, da sudovi u presudi kojom se vozilo oduzima ne naznače kako dalje da se postupa s oduzetim vozilom, tako da prema raspoloživim podacima danas imamo situaciju da agencije za provođenje zakona imaju deponovano 4.576 motornih vozila“*. Također je navedeno da za *„1.569 vozila postoji pravosnažna sudska presuda o oduzimanju vozila, a 1.110 vozila je privremeno oduzeto“*. Znajući da se veliki broj oduzetih vozila nalazi u depozitu institucija i više godina, možemo samo pretpostaviti koliki trošak za budžete institucija predstavlja čuvanje ovih vozila, jer u podacima koje je iznijela Radna grupa navedeno je da samo *„budžet Distrikta Brčko BiH depozit godišnje košta više od 100.000,00 KM (u cijenu su uračunati troškovi čuvara, videonadzora, struje i parking-prostora)“*. Navedeno ukazuje na nepotrebno izdvajanje znatnih finansijskih sredstava te kadrovskih resursa, što predstavlja trošak za budžete Bosne i Hercegovine, entiteta i Distrikta Brčko Bosne i Hercegovine.

Shodno Pravilima za konsultacije u izradi pravnih propisa ("Službeni glasnik BiH" br. 81/06), prijedlog zakona bio je dostupan javnosti od 26.09.2012. do 17.10.2012. godine putem web-stranice Ministarstva pravde Bosne i Hercegovine. Procesom javnih konsultacija želi se osigurati veći nivo učestvovanja interesnih grupa u ovoj zakonodavnoj aktivnosti, bolja informisanost i veće povjerenje građana, ali nije bilo nikakvih primjedbi ili sugestija.

VI - REVIZIJA POSTOJEĆIH PROPISA

Donošenje i primjena ovog zakona ne zahtijevaju izmjene postojećih propisa.

VII - FINANSIJSKA SREDSTVA ZA PROVOĐENJE PROPISA

Ovim zakonom propisano je da se sredstva za organizovanje i rad Agencije osiguravaju u Budžetu Bosne i Hercegovine.

Agencija neće imati svoj objekt, mada takvu mogućnost treba ostaviti otvorenom, ukoliko Kanton Sarajevo bude želio ustupiti građevinski objekt ili dio građevinskog objekta privremeno ili trajno na korištenje. U svakom slučaju, u prvoj godini primjene zakona ne očekuje se da će Agencija imati cijeli ili dio objekta na trajnom ili privremenom korištenju.

Osiguranje sredstava za nabavku opreme zavisi od ukupnog broja zaposlenih u Agenciji. Prema procjeni, Agencija će imati osam zaposlenih (jedan - direktor Agencije, četiri državna službenika - VSS, jedan administrativni službenik, jedan računovođa s VŠS spremom i jedan tehnički sekretar).

Svaki zaposleni treba da ima računar, odnosno potrebno je osam računara, čija ukupna vrijednost iznosi blizu 16.000 KM, s uključenim PDV-om.

Za zaposlene treba osigurati i sljedeći kancelarijski namještaj:

• radni sto (osam komada).....	3.200 KM
• radne stolice (osam komada).....	800 KM
• telefoni (pet komada).....	750 KM
• vitrine za dokumentaciju (pet komada).....	1.500 KM
• ostali namještaj.....	<u>750 KM</u>
Ukupno:	7.000 KM

Prema tome, za nabavku opreme za potrebe Agencije u prvoj godini primjene zakona potrebno je 23.000 KM.

Zakup objekta, odnosno zakup poslovnog prostora je vjerovatnija varijanta osiguranja uvjeta za rad Agencije. Za toliki broj zaposlenih potrebno je pet kancelarija od po 16 metara kvadratnih u Sarajevu. Prema procjeni, prosječna mjesečna zakupnina s PDV-om iznosi približno 1.500 KM, a u prvoj godini primjene zakona iznosi gotovo 18.000 KM. Također, potreban je skladišni prostor za privremeno i trajno oduzetu robu (najmanje 500 m²), a prosječna mjesečna zakupnina s PDV-om iznosi približno 7.500 KM, a u prvoj godini primjene zakona iznosi blizu 80.000 KM. Ukoliko se ne bude plaćala zakupnina, nego se budu plaćali troškovi investicionog održavanja, a potom obračunavala i amortizacija, tada će se planirani iznos smanjiti najmanje za 50%.

Za svaku od pet kancelarija neophodno je osigurati prosječne uvjete za rad, što podrazumijeva osiguranje sredstava za sljedeće vrste troškova:

• troškovi električne energije (po 50 KM mjesečno)	600.00 KM
• troškovi toplotne energije (po 30 KM)	360.00 KM
• PTT-troškovi i troškovi telefona (po 50 KM)	600.00 KM

- troškovi kancelarijskog materijala (po 30 KM mjesečno) 360.00 KM
- ostale usluge (po 50 KM mjesečno) 600.00 KM

Iz navedenog proizlazi da za svaku od kancelarija treba osigurati najmanje 2.520,00 KM, odnosno za svih pet kancelarija u prvoj godini primjene zakona ukupno blizu 12.600,00 KM.

Brutoplaće treba da se planiraju vodeći brigu o razvrstavanju u platne razrede i koeficijente u skladu sa Zakonom o plaćama i naknadama u institucijama Bosne i Hercegovine: direktor Agencije - platni razred i koeficijent za izabrane i imenovane osobe od 5,51; četiri stručna savjetnika - platni razred i koeficijenti za stručno osoblje i državne službenike od 2,73; administrativni službenik - 1,40; jedan računovođa s VŠS spremom - 1,70 i tehnički sekretar - 1,29.

Brutoplaće za platne razrede i koeficijente: jedna osoba od 5,51; četiri osobe - koeficijenti od 2,73; jedna osoba s 1,40; jedna s 1,70 i jedna s koeficijentom 1,29. Imajući u vidu broj novozaposlenih u Agenciji, školsku spremu, potrebno radno iskustvo kao procent uvećanja za radni staž, poreze i doprinose te važeći iznos osnovice za obračun, brutoplaće na godišnjem nivou bi iznosile blizu 215.501,40 KM, a naknade za osam novozaposlenih približno 30.793,00 KM.

Za ostale nespomenute rashode, zbog načela opreznosti potrebno je planirati iznos 10.000 KM.

Konačno, BiH će u prvoj godini primjene zakona biti dužna da osigura:

oprema	približno 23.000,00 KM
zakup poslovnog prostora	približno 18.000,00 KM
zakup skladišnog prostora	približno 80.000,00 KM
osiguranje sredstava za redovne troškove	približno 12.600,00 KM
naknade	približno 30.793,00 KM
brutoplaće	približno 215.501,00 KM
nespomenuti rashodi	približno 10.000,00 KM

.....
Ukupno:389.894,00 KM

Podrazumijeva se da se određene uštede mogu postići, ako se iz drugih izvora osiguraju sredstva. Naprimjer, novčana sredstva mogu biti osigurana od donatora, oprema od budžetskih korisnika BiH, lokalnih zajednica itd.

U vezi s opravdanosti navedenih finansijskih sredstava i opravdanosti za osnivanje Agencije, želimo istaći samo nekoliko podataka:

Svi sudovi u Bosni i Hercegovini u toku 2006. i 2007. godine od počinitelaca krivičnih djela protiv privrede i platnog prometa oduzeli su imovine pribavljene krivičnim djelom u vrijednosti 48.648.333,05 KM, a u krivičnim postupcima za krivična djela organizovanoga kriminala imovine u vrijednosti 147.021,55 KM, 4.000,00 eura, šest računara itd.

U toku 2007. godine u sudovima u Bosni i Hercegovini u 138 predmeta oduzeta je imovinska korist stečena izvršenjem krivičnog djela u iznosu 26.582,259 KM.

Sud Bosne i Hercegovine je u 2009. godini u 29 predmeta donio odluku o oduzimanju nezakonito stečene imovine, u ukupnoj vrijednosti oduzete imovinske koristi 4.385.284 KM, a u 2010. godini u 67 predmeta ukupna vrijednost oduzete imovinske koristi iznosi 10.114.774 KM.

Aktom broj: 02-1ž-10-PBIH-283/11 od 13.02.2012. godine, koji je Pravobranilaštvo Bosne i Hercegovine uputilo Sudu Bosne i Hercegovine, istaknuti su razlozi i nemogućnost provođenja mjere izvršenja odluka Suda o oduzimanju nezakonito stečene imovine. U aktu se navodi da se radi o 56 predmeta, a iznos protivpravno stečene imovinske koristi je 7.738.759,43 KM.

S obzirom na to da su sudovi nadležni da donose odluke te da se u većini slučajeva zbog nemogućnosti skladištenja, čuvanja i upravljanja ne koriste mjere kojima bi se osigurala imovina do okončanja sudskog postupka, odnosno trajnog oduzimanja imovine, izvršenje odluka postane bezuspješno, jer osumnjičeni u toku postupka otuđe nezakonito pribavljenu imovinu. Slična situacija je i s privremeno oduzetim predmetima koji se ostave na čuvanje osobi od koje se oduzimaju ili zbog neadekvatnog skladištenja, odlaganja i čuvanja gube na vrijednosti.

Dakle, imajući na umu navedeno, smatramo da će uspostavom Agencije biti u potpunosti realizovan propisani osnov za oduzimanje imovinske koristi proistekle iz krivičnog djela, i to po principu da niko ne može zadržati takvu imovinsku korist koja je oduzeta sudskom odlukom. Odnosno, imovinska korist proistekla iz krivičnog djela postat će svojina Bosne i Hercegovine, kako to propisuje član 31. ovog zakona.